



PATNUBAY SA MISA

27 Enero 2019

Ikatlong Linggo sa Karaniwang Panahon


Taon K

PAMBANSANG LINGGO NG BIBLIYA

Si Hesukristo bilang Katuparan ng Banal na Kasulatan

Tayo ay nasa Ikatlong Linggo sa Karaniwang Panahon. Nais tayong turuan ng Panginoong ang Salita ng Diyos ay mabisa at laging natutupad. Ang bisa at katuparan ng Banal na Kasulatan ay nasa Panginoong Hesukristo. Sumasakaniya ang Espiritung Banal upang maipahayag niyang tumutupad ang Diyos sa kanyang mga pangako.

Sa Pambasang Linggo ito ng Bibliya, dumami pa nawa ang mga magtatalaga ng sarili sa pagpapalaganap ng Salita ng Diyos at pagmamahal sa Banal na Kasulatan. Sana'y lumakas din ang ating tiwala sa Salita ng Diyos.



PASIMULA



Pambungad

(Ipahahayag lamang kung walang awiting nakahanda.)

Panginoon'y papurihan, bagong awit s'ya'y awitan. Umawit ka, sanlibutan, sa dangal n'ya't kabanalan, at ganda sa dalanginan.

Pagbati

P–Ang pagpapala ng ating Panginoong Hesukristong siyang katuparan ng mga pangako ng Diyos, ang pag-ibig ng Diyos Ama, at ang pakikipagkaisa ng Espiritu Santo ay sumainyong lahat!

B– At sumaiyo rin!

Pagsisihi

P–Nagsasaya tayo sa Panginoong Hesus na siyang nagbigay katuparan sa mga pangako ng Diyos. Pagsisihan natin ang ating kawalan ng tiwala sa Salita ng Diyos.

(Manahimik sandali.)

P– Para sa aming kawalan ng pananampalataya sa iyong dakilang katapatan, Panginoon, kaawaan mo kami.

B –Panginoon, kaawaan mo kami!

P –Para sa aming kahinaan ng pag-asa sa katuparang iyong dala sa mga pangako ng Diyos, Kristo, kaawaan mo kami.

B –Kristo, kaawaan mo kami!

P –Para sa aming kakulangan ng pagmamahal sa iyo at ng aming pakikiisa sa iyong mga balak, Panginoon, kaawaan mo kami.

B –Panginoon, kaawaan mo kami!

P –Kaawaan tayo ng makapangyarihang Diyos, patawarin tayo sa ating mga kasalanan, at dalhin tayo sa buhay na walang hanggan.

B – Amen!

Papuri

B– Papuri sa Diyos sa kaitaasan

at sa lupa'y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbubunyi ka namin, pinasalamatan ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalanging Pambungad

P—Ama naming makapangyarihan, itaguyod mo ang aming ginagampanan alinsunod sa iyong kalooban upang sa ngalan ng Anak mong mahal, kami’y maging marapat magkaroon ng karagdagan sa aming paggawa ng mga kabutihan sa pamamagitan ni Hesukristo kasama ng Espiritu Santo magpasawalang hanggan.
B—Amen!

PAGPAPAHAYAG NG SALITA NG DIYOS



Unang Pagbasa *Neh 8:2-4a. 5-6.8-10*

Ang Aklat ni Nehemias ay tungkol sa gobernador ng Judea na siyang nagpaayos ng mga pader ng Lunsod ng Jerusalem. Nagdala rin siya ng maraming kaayusan sa buhay ng mga Hudiyong bumalik sa lupain ng Israel galing sa pagkakatapon sa Babilonia. Ang ating sipi ay naglalahad ng pagbabasa ng Punong Paring si Esdras ng Aklat ni Moises bilang gabay para sa Bayan ng Diyos.

L—Pagpapahayag mula sa Aklat ni Propeta Nehemias

Noong mga araw na iyon, kinuha ni Ezra na saserdote ang aklat ng Kautusan. Dinala niya ito sa kapulungang binubuo ng mga lalaki, babae at mga batang may sapat nang gulang at pang-unawa. Mula sa umaga hanggang tanghali, binasa niya ang Kautusan sa harapan ng mga taong natitipon sa liwasang bayan. Ang lahat naman ay nakinig na mabuti. Si Ezra’y nakatayo sa isang entabladong kahoy na sadyang itinayo sa pagkakataong iyon. Siya ay nakikita ng lahat, sapagkat mataas ang kanyang kinatatayuan. Ang lahat ay tumayo nang buksan niya ang aklat. “Purihin ang Panginoon, ang dakilang Diyos!” ang wika niya. Ang lahat ay nagtaas ng kanilang mga kamay at sumagot, “Amen, Amen.” Pagkatapos, nagpatirapa sila bilang paggalang sa Panginoon. Binasa ng mga Levita nang maliwanag ang batas na ito ng Diyos at ipinaliwanag na mabuti ang kahulugan.

Nang malaman ng mga tao ang mga dapat nilang gawin ayon sa Kautusan, nabagbag ang kanilang kalooban, anupat sila’y napaiyak. “Ang araw na ito ay dakila sa Panginoon na inyong Diyos,” wika nina Nehemias, at Ezra at mga Levita. Nakikinig ang

mga tao at umiiyak nga kaya’t sinabi nila, “Huwag kayong umiiyak.” Wika pa nila, “Umuwi na kayo at magdiwang! Ang walang pagkain at inumin ay bahagian ng mayroon, sapagkat ang araw na ito’y dakila sa Panginoon. Ang kagalakang dulot niya ay magiging kalakasan ninyo.”

Ang Salita ng Diyos!
B—Salamat sa Diyos!

Salmong Tugunan *Awit 18*
B—*Espiritung bumubuhay, ang salita ng Maykapal!*

R. M. Velez

Es---pi---ri---tung bumubu---hay,
ang sa---li---ta ng May---ka---pal!

* Ang batas ng Panginoon ay batas na walang kulang, ito’y utos na ang dulot sa tao ay bagong buhay; yaong kanyang mga batas ay mapagtitiwalaan, nagbibigay ng talino sa pahat ang kaisipan. **B.**

* Ang tuntuning ibinigay ng Poon ay wastong utos, liligaya ang sinuman kapag ito ang sinunod; ito’y wagas at matuwid pagkat mula ito sa Diyos, pang-unawa ng isipan yaong bungang idudulot. **B.**

* Yaong paggalang sa Poon ay marapat at mabuti; isang banal na tungkulin na iiral na parati; pati mga hatol niya’y matuwid na kihatulan, kapag siya ang humatol, ang pasiya ay pantay-pantay. **B.**

* Nawa’y itong salita ko at ang aking kaisipan, sa iyo ay makalugod, Panginoon ko’t kanlungan. O ikaw na kublilian kong ang dulot ay kaligtasan! **B.**

Ikalawang Pagbasa *1 Cor 12: 12-30*

Pagkakaisa ang dakilang tanda ng Bayan ng Diyos. Hindi nakukuha ang pagkakaisa sa pagkakatulad ng mga gawain ng mga kaanib. Ito ay bunga ng maayos na pagtutulungan ng mga kaanib na iba’t iba ang tungkuling ginagampanan. Ito ang idinidiin ni San Pablo sa mga Kristiyano ng Corinto.

L—Pagpapahayag mula sa Unang Sulat ni Apostol San Pablo sa mga taga-Corinto

Mga kapatid:

Si Kristo’y tulad ng isang katawan na may maraming bahagi; bagamat binubuo ng iba’t ibang bahagi, iisa pa ring katawan.

Tayong lahat, maging Judio o Griego, alipin man o malaya, ay bininyagan sa iisang Espiritu upang maging isang katawan. Tayong lahat ay pinainom sa isang Espiritu. Ang katawan ay binubuo ng maraming bahagi at hindi ng isang bahagi lamang. Kung sabihin ng paa, “Hindi ako kamay kaya’t hindi ako bahagi ng katawan,” hindi na nga ba ito bahagi ng katawan? Kung sabihin ng tainga, “Hindi ako mata, kaya’t hindi ako bahagi ng katawan,” hindi na nga ba ito bahagi ng katawan? Kung panay mata lamang ang buong katawan, paano ito makaririnig? Kung panay tainga lamang ang buong katawan, paano ito makaaamoy? Subalit inilagay ng Diyos ang bawat bahagi ng katawan ayon sa minabuti niya. Hindi maituturing na katawan, kung ito’y iisang bahagi lamang!

Ngunit ang totoo’y marami ang mga bahagi, ngunit iisang katawan lamang. Kaya’t hindi masasabi ng mata sa kamay, “Hindi kita kailangan,” ni ng ulo, sa mga paa, “Hindi ko kayo kailangan.” Sa katunayan, ang mga bahaging wari’y mahihina ang siya pang kailangang-kailangan. Ang mga bahagi ng katawan na inaakala nating hindi gaanong kapuri-puri ay pinag-uukulan ng higit na pag-aalaga. Ang mga bahaging hindi likas na maganda ay siya nating pinagaganda; hindi na ito kailangang gawin sa mga bahaging sadyang maganda. Nang isaayos ng Diyos ang ating katawan, binigyan niya ng higit na karangalan ang mga bahaging di gaanong marangal, upang hindi magkaroon ng inggitan; at sa halip, ang lahat ay magmalasaktan. Kung nasasaktan ang isang bahagi, nasasaktan ang lahat; kung pinararangalan ang isang bahagi, nagagalak ang lahat.

Kayo ngang lahat ang iisang katawan ni Kristo at bawat isa’y bahagi nito. Naglagay ang Diyos sa Simbahan, una, ng mga apostol; ikalawa, ng mga propeta; at ikatlo, ng mga guro. Naglagay rin siya ng mga gagawa ng mga kababalaghan, mga magpapagaling ng mga maysakit, mga tagatulog, mga tagapangasiwa, at mga magsasalita sa iba’t ibang wika. Hindi lahat ay apostol, propeta, o guro; hindi lahat ay binigyan ng kakayahang gumawa ng mga

kababalaghan, magpagaling ng mga maysakit, magsalita sa iba't ibang wika o magpaliwanag nito.

Ang Salita ng Diyos!

B– Salamat sa Diyos!

Aleluya *Lu 4:18*

B– Aleluya! Aleluya!

Ikaw, Kristo ay sinugo upang sa dukha'y magturo, magpalaya sa bilango. Aleluya! Aleluya!

Mabuting Balita *Lu 1:1-4; 4:14-21*

Ang sipi ng ating Ebanghelyo ay may dalawang bahagi. Ang una ay ang panimulang kay Lucas lamang matatagpuan, tulad ng maraming akda sa panitikang Griego. Nais bigyan ni Lucas ang mga babasa ng kanyang akda ng katiyakan sa mga nilalaman nito. Ang ikalawa ay ang paglalahad ng pagsisimula ng pangangaral ni Hesus na naganap sa Nazaret, ang bayang kanyang nilakhan.

P– Ang Mabuting Balita ng Panginoon ayon kay San Lucas
B– Papuri sa iyo, Panginoon!

Kagalang-galang na Teofilo:

Marami na po ang nagsikap na sumulat tungkol sa mga bagay na naganap sa gitna namin. Ang kaniyang sinulat ay ayon sa sinabi sa amin ng mga nakasaksi nito buhat sa pasimula at nangaral ng Salita. Matapos na ako'y makapagsuri nang buong-ingat tungkol sa lahat ng bagay na ito buhat pa sa pasimula, minabuti ko pong sumulat ng isang maayos na salaysay para sa inyo upang lubusan ninyong matiyak ang katotohanan ng mga bagay na itinuro sa inyo.

Noong panahong iyon, bumalik si Hesus sa Galilea, at sumasakanya ang kapangyarihan ng Espiritu Santo. Kumalat sa palibot na lupain ang balita tungkol sa kanya. Nagturo siya sa kanilang mga sinagoga; at dinakila siya ng lahat.

Umuwi si Hesus sa Nazaret na kanyang nilakhan. Gaya ng kanyang kinagawian, pumasok siya sa sinagoga nang Araw ng Pamamahinga. Tumindig siya upang bumasa; at ibinigay sa kanya ang aklat ni Propeta Isaias. Binuksan niya ang aklat sa dakong kinasusulatan ng ganito: "Sumasaakin ang Espiritu ng Panginoon, sapagkat hinirang niya ako upang ipangaral sa mga

dukha ang Mabuting Balita. Sinugo niya ako upang ipahayag sa mga bihag na sila'y lalaya, at sa mga bulag na sila'y makakikita; upang bigyang-kaluwagan ang mga sinisil, at ipahayag ang pagliligtas na gagawin ng Panginoon."

Nilulon niya ang kasulatan, at matapos isauli sa tagapaglingkod, siya'y naupo. Nakatitig sa kanya ang lahat ng nasa sinagoga. At sinabi niya sa kanila: "Natupad ngayon ang bahaging ito ng Kasulatan samantalang nakikinig kayo."

Ang Mabuting Balita ng Panginoon!

B– Pinupuri ka namin, Panginoon ng Hesukristo!

Homiliya

Sumasampalataya

B– Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P– Tayo ay nagagalak sa katiyagan ng Diyos sa Kanyang mga pangako. Puno ng paghahangad na matanggap ang turo ni Hesus, ating sasambitin:

B– Amang tapat, dinggin Mo ang aming panalangin!

* Para sa mga namumuno sa Simbahan, upang maging masugid sila sa pagpapatotoo sa

bisa at tibay ng Salita ng Diyos, manalangin tayo sa Panginoon.

B.

* Para sa lahat ng mga kabataan ng ating bayan, upang sa taong ito ng mga kabataan ay mapalalim nila ang kanilang kaalaman at pagsasabuhay ng Salita ng Diyos, manalangin tayo sa Panginoon.

B.

* Para sa mga namumuno sa ating bansa, upang maitaguyod nila nang buong tapang ang diwa ng Salita ng Diyos na siyang huhubog sa isang matipunong lipunang Pilipino, manalangin tayo sa Panginoon.

B.

* Para sa mga taong nagtalaga ng sarili sa pagpapalaganap ng Salita ng Diyos, upang makatagpo sila ng mga taong may mabuting kalooban at bukas ang puso sa pahatid ng Poong Maykapal, manalangin tayo sa Panginoon.

B.

* Para sa ating lahat na nagkakatipon sa pagdiriwang na ito, upang sumidhi ang ating pananabik sa pagtupad ng Diyos ng Kanyang mga ipinangako sa Banal na Kasulatan, manalangin tayo sa Panginoon.

B.

* Tahimik nating ipanalangin ang ating mga sariling kahilingan. (*Tumigil sandali.*)

Manalangin tayo!

B.

P– Ama naming tapat sa Iyong salita, isugo Mo sa amin ang handog ng Banal na Espiritu upang mabuksan ang aming mga kalooban sa Iyong pahatid, mahal namin ang Banal na Kasulatan, at maisabuhay ang turo ng Iyong Anak na si Hesukristong aming Panginoon.

B– Amen!



P– Manalangin kayo. . .

B– Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P– Ama naming Lumikha, tang-

gapin mong malugod ang aming mga handog. Ngayong ang kabanalan ay iyong dulot, kami'y sumasamo sa iyo't lumuluhog upang kaligtasa'y iyong ipagkaloob sa pamamagitan ni Hesukristo kasama ng Espiritu Santo magpasawalang hanggan.

B– Amen!

Prepasyo III

P– Ama naming makapangyarihan, tunay ngang marapat na ikaw ay aming pasalamat.

Sa iyong kagandahang-loob kami'y iyong ibinukod upang iyong maitampok sa kadakilaan mong lubos. Kahit na ikaw ay aming tinalikdan dahil sa aming pagkasalawahan, gumawa ka pa rin ng magandang paraang may manguna sa amin para ikaw ay balikan. Kaya't ang iyong minamahal na Anak ay naging isa sa mga taong hamak upang may kapwa kaming makapagligtas sa aming pagkapahamak at pagkaligaw ng landas.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

B– Santo, santo, santo. . .

Pagbubunyi

B– Aming ipinahahayag na matay ang 'yong Anak, nabuhay bilang Mesiyas at magbabalik sa wakas para mahayag sa lahat.



B– Ama Namin . . .

P– Hinihiling namin . . .

B– Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B– Kordero ng Diyos na nag-aalis ng mga kasalanan ng sanlibutan, maawa ka sa amin. (2x)

Kordero ng Diyos na nag-aalis

ng mga kasalanan ng sanlibutan, ipagkaloob mo sa amin ang kapayapaan.

Paanyaya sa Pakikinabang

P– Ito ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging. **B–** Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinabang

(Ipahahayag lamang kung walang awiting nakahanda.)

Sa Panginoon'y dumulog nang maliwanagang lubos at nang kanyang maitampok ang mukha natin at loob sa dulot n'yang pagkukupkop.

Panalangin Pagkapakinabang

P– Ama naming mapagmahal, ipagkaloob mong sa aming pakikinabang sa iyong kagandahang-loob na bumubuhay, lagi nawa naming maikarantal ang iyong pagpapalang sa ami'y ibinibigay sa pamamagitan ni Hesukristo kasama ng Espiritu Santo magpasawalang hanggan.

B– Amen!

PAGWAWAKAS



P– Sumainyo ang Panginoon.

B– At sumaiyo rin!

P– Magsiyuko at ipanalangin ang pagpapala ng Diyos. (*Manahimik sandali.*)

Patnubayan nawa kayo ng Salita ng Diyos sa landas ng tunay na Kristiyanong pamumuhay.

B– Amen!

P– Iligtas nawa kayo ng Panginoon sa lahat ng panganib at magtagumpay nawa kayo sa inyong mga gawain.

B– Amen!

P– Iadya Niya nawa kayo sa lahat ng alalahanin at tibayan ang inyong kalooban sa Kanyang pagmamahal.


B– Amen!

P– Pagpalain kayo ng makapangyarihang Diyos: Ama, Anak at Espiritu Santo.

B– Amen!

P– Humayo kayo sa kapayapaan upang mahalina at paglingkuran ang Panginoon.

B– Salamat sa Diyos!



Nais ba ninyong malaman ang mensahe ng Diyos para sa inyo ngayon?

Basahin ang **“Ang Salita ng Diyos”** na salin sa Filipino ni Cecilia G. Valmonte ng **“THE WORD OF GOD”** ni **Fr. John Larrea, SDB** at namnamin ang yaman ng Banal na Kasulatan.

(May kasamang katesismo at mga pagbasang liturhiko para sa bawat Linggo o Kapistahan)

MABIBILI SA WORD & LIFE PUBLICATIONS



WORD & LIFE PUBLICATIONS

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 894-5401; 894-5402; 892-2169 • Telefax: 894-5241 • Website: www.wordandlife.org

• E-mail: marketing@wordandlife.org; wordandlifepublications@gmail.com • FB: Word & Life Publications

• Editorial Team: Fr. S. Putzu, Fr. R. Lagaya, C. Valmonte, V. David, J. Domingo, A. Adsuara, D. Daguio

• Illustrations: A. Sarmiento, B. Cleofe • Marketing: Fr. B. Nolasco and T. Mojica • Circulation: R. Saldua